

新纂雲南通志

第八
函
十
冊



新纂雲南通志卷一百九目錄

祠祀考一

典祀一

雲南府

新纂雲南通志卷一百九

祠祀考一

道光志祠祀分爲三目一曰典祀掌於有司官爲致祭者也二曰俗祀不隸於官人民祈年報賽法所不禁者也三曰寺觀二氏者流巖棲谷處凡棟宇之在其地亦必登諸簡策者也後來光緒志祠祀亦多相沿不改及至近代以來時勢變遷從前祠祀所在已有改爲學校者或改爲公所者抑或改爲工廠者已非復疇昔之舊制矣本志仍照舊志分列畧事刪節其有已改爲學校公所及工廠者則說明於下以備稽考云

典祀一

品節儀文載諸令甲有司行事必恭以虔者備詳於此聖廟釋菜昔

爲特典學制考別詳之矣其附於聖廟之史皇名宦鄉賢忠義孝弟節孝等祠仍與其他並列

雲南府志

昆明縣志

先農壇在城東門外清雍正四年八月奉諭各省一體創建壇高二尺一寸方廣二丈五尺祠三楹左右齋房各二左貯農具耒耜穀右爲辦祭所耜田四畝九分欽定日期督撫率司道各官致祭各府知府主之各州縣知州知縣主之同城文武官員悉陪祭奏樂歌樂章祭畢行耕耨禮通省府屬各州縣方位皆與府同其分防之邱北大關魯甸攸樂礪嘉維西中甸俱係經營錢糧十二年布政使陳宏謀詳明一體建造咸豐七年兵燹燬同治十三年總督

劉嶽昭巡撫岑毓英重修

以上參雍正道光緒三志

附雍正八年四月諭旨

道光

國家以民爲本民以食爲天朕卽位以來念切民依舉行耕藉之禮殫竭精誠爲民祈穀於上帝乃雍正二年三年耕田疊產嘉禾有至一莖九穗者朕心亦以爲偶然之事今據府尹劉于義進呈今歲耕田所產自一莖雙穗三穗以至八穗九穗皆碩大堅好異

於常穀朕見之心甚慰悅特令宣示廷臣朕並非以此爲祥瑞誇耀於衆也蓋實有見於天人感召之理捷於影響無纖毫之或爽朕以至誠肅懇之心每歲躬耕藉田以重農事卽蒙上帝降靈疊產嘉禾以昭休應似此八穗九穗之穀豈人力之所能強爲亦豈

人君所能強之使有乎天人感應之理朕見之最真最切但恐此心不誠耳誠則未有不動者卽如從前青海蠢動朕爲邊陲憂慮虔禱於宮中不數旬而捷音卽至疆宇寧謐又聞前歲夏間近畿雨澤稍愆朕在宮中默禱減膳修省虔誠叩懇不數日而甘霖大

沛禾稼有秋此皆近年以來朕親行親驗之事至於去年夏秋之間時常陰雨而朕在宮中但覺雨水稍多不知其大爲民患而李維鈞並不將畿輔被潦實情具奏是以朕竟不聞知未嘗早爲虔禱殫竭誠心以挽天意而舒民困及蔡珽署直隸總督事務詳細

奏聞朕宵旰憂勤幾費寢食於是截漕發倉多方賑濟京城設廠各邑與工俾窮民皆得糊口是以地方雖被水災而小民不致流離失所朕撫綏憫惜之念實爲迫切今歲二麥豐收禾黍暢茂此皆上天俯鑒朕衷故加惠黎元而錫以盈寧之慶也蓋天生民而

立之君鑒觀在上人君一念敬謹政事無闕天必嘉之佑之一念放逸政事有乖天必儆之戒之此一定之理也況人君撫馭臣庶位處極尊所以賞罰之者獨有上天耳是以朕每於水旱等事皆實心內省必係朕有過失上天儆戒示誡也至於各省旱澇之事

朕皆視同一體原無彼此之別惟是地方相隔路遠彼地偶有水旱有司未必卽行具報及至奏達朕前而緊急之時已過是以朕無從盡其誠心爲之祈禱此其責全在本省督撫矣督撫受朕委任之重爲朕養育萬民必視百姓之疾苦如痛癢之在己身一遇

水旱饑饉必思所以致此之由或因本省之政事吏治有闕卽思速爲改易之或因本地之人心風俗不端卽思速爲化導之兢兢業業修省祈禱竭盡誠心一如朕之朝乾夕惕斷無不可以挽回天意者假若聞朕之政事稍有闕失亦卽直言陳奏不必隱諱如

此則官與民聯爲一體臣與君又聯爲一體太和翔洽實意交孚天聽雖高誠呼吸可通矣朕每歲躬耕藉田並非崇尙虛文以爲觀美實是敬天勤民之至意禮曰天子爲藉千畝諸侯百畝據此則耕藉之禮亦可通於臣下矣朕意欲令地方守土之官俱行耕

藉之禮使之知稼穡之艱難悉農民之作苦量天時之晴雨察地利之肥磽如此則凡爲官者皆時存重農課稼之心則凡爲農者亦斷無苟安怠惰之習似與養民務本之道大有裨益著九卿詳議具奏特諭欽此

附總督鄂爾泰樂辭七章及先農說藉田說

道光志

迎神奏永豐之章 勾芒秉令土牛是驅天下一人蒼龍駕車念彼田疇民命所嚮生成有德尙式臨諸 初獻奏時豐之章 先農神哉耒耜教民田祖靈哉稼穡是賴功德深厚天地同仁肅將幣帛肇舉明禋厥初生民萬類莫辨神錫之庥嘉種乃誕執茲體

泉農功益見玉瓊椒醕肅雍舉奠 亞獻奏咸豐之章 上原下隰百穀盈止粒我生民秀良興起樂舞具備吹竽稱咒再躋以獻 有馨酒旨 終獻奏大豐之章 廩芑秬秠惟神所貽以神饗神曰予將之秉耒三推東作允宜五風十雨率土何私 徹饌奏慶

豐之章 於皇農事自古爲烈莫敢不承今茲所悅籩豆既豐簠簋云潔神視井疆執事告徹 送神奏報豐之章 麻麥芃芃杭稻連阡縱橫萬里皆神所瞻人歌鼓腹史載有年歲有常典萌祿絳延 望瘞奏慶豐之章 玉版蒼幣來監來歆敬之重之藏於

厚深典禮由古子行自今樂利國以永寧 又先農說 藉田之禮宜祀先農夫先農何神也始於何時神位宜何如書壇設何所涓吉何日陳設何器祭享何品樂奏何章既躬親其事敢不先考正其說試爲略言之古聖王之制祭祀也法施於民則祀之

是故厲山氏之有天下也其子曰農能殖百穀周棄繼之故祀以爲稷此祀稷之始也共工氏之霸九州也其子曰后土能平九州故祀以爲社此祀社之始也而郊特牲稱天子大蜡八先嗇一神農也司嗇二后稷之官也農三古之田畯有功於民者也郵表

四郵亭之舍標表田畝田畯居之以督耕者也貓虎五貓食田鼠虎食田豕皆有功於稼者也防六水庸七防隄也以蓄水亦以障水水庸溝也以受水亦以洩水皆農事之備也昆蟲八螟蝗之屬害稼者也故蜡之祭有八皆以爲農而以先嗇爲主蓋以神農

爲八神之主此祀農之始也班固食貨志又從而申其說曰關土殖穀曰農炎帝教民殖穀故號神農氏謂神其農業也又厲山氏有子曰農能殖百穀後世因名耕田曰農其言農之義甚著而先農之稱考之於經未有記載惟劉向五經要義曰壇於田以祀先

農如杜衡宏漢儀春始東耕於籍田引詩先農則神農也魏秦靜議風伯雨師靈星先農社稷爲國六神晉大始四年耕於東郊以太牢祀先農周隋及唐所稱先農皆祭神農於帝社配以后稷卽貞觀初太宗親耕東郊仍藉田壇之名垂拱中乃以藉田壇爲先

農開元十三年祀神農於壇上以后稷配二十三年親祀神農於東郊配以勾芒遂躬耕耒耜止乾元二年詔去耒耜雖刻天子出通化門釋駟而入壇遂祭神農以后稷配冕而朱紱躬九推焉憲宗元和五年詔以來歲正月藉田太常修撰章公肅言藉田禮廢

入矣有司無可考乃據禮經參考開元乾元故事爲先農壇於籍田此先農壇之所由來也漢文帝紀二年春正月丁亥開籍田唐禮樂志孟春吉亥享先農此春月亥日祀先農之所由來也臣於是本之經任之史核之國朝會典而爲之參酌其制卽如今之於

神位也則書曰先農之神蓋以神農后稷皆各有專祀而於此則統而書之也然以顯示天下使農夫皆能曉其義則必實指其名而數之曰某某敬農之君某某勸農之官也使農夫皆得津津口頰轉相稱誦愛慕嚮往而後其用力益勤則是先農之位宜主神

農而配以后稷神農居中后稷居右皆南嚮田畯以下依八蜡之禮皆東西向比於兩廡之祀而位次正矣諸侯親耕於東郊則督撫以下籍田皆宜在東郊先農壇在籍田之北壇門南向中爲先農壇壇高而方四面有階祭日奉神位以祀壇之後爲神庫如宗

廟寢室之制以安神位壇之前旁爲瘞池以瘞毛血神庫之左爲神倉儲籍田之穀以供粢盛酒醴神庫之右爲宰牲亭以供親割壇門外爲觀耕臺臺下爲籍田壇之旁別置齋室示祭而先齋既祭而燕皆於其地而壇基立矣古之躬耕在孟春元辰後之躬耕

在孟春吉亥宗乎古則宜用元辰法乎近則宜用吉亥但孟春之月土雖脈發凍未全解今酌以仲春之吉亥而吉定矣其在祭器則三爵一尊酒蓋三十登一銅一簋二簋十豆十饌一組一毛血盤一鑪一燭臺二香案一祝版一而祭器備矣其在祭品天子則

用太牢今皆撫以下惟用少牢餘無可減爵實以酒醴登實以太羹綱實以和羹簠實以黍稷簋實以稻粱邊實以棗栗榛菱芡鹿脯白餅黑餅形鹽蠶魚豆實以菁菰芹苴苡苴韭苴鹿醢兔醢魚醢醢脾析豚胸籠實以青色量幣俎實以羊一豕一而品物齊

矣若夫樂奏七章則以丁祭樂舞爲之舞佾如其數迎神奏永豐之章奠帛初獻奏時豐之章亞獻奏咸豐之章終獻奏大豐之章徹饌奏屢豐之章送神奏報豐之章望瘳奏慶豐之章七闋既終而樂奏成矣未祭之先自齋宿以至於省牲省具演禮演樂祭之

日自迎神以至於初獻終獻送神望瘳悉如文廟之儀而大禮舉矣位次正而心不疑壇基立而地不遷涓吉定而時不忒祭器備而知其不可假易品物齊而知其不貴殊珍樂奏成而無有不和大禮舉而孰敢不敬而先農說於是乎畢又籍田說禮之有

籍田也明仁也教孝也以天子之尊而必親耕則天下之爲農者孰不勤於耕此天子之仁愛天下而使之務本也所以明仁也以天子之尊而必親耕以供粢盛則天下之爲子者孰不勤於養親此天子之孝先天下而使之養親也所以教孝也月令有之曰孟

春之月天子乃以元日祈穀於上帝乃擇元辰天子親載耒耜措之於參保介之御間帥三公九卿諸侯大夫躬耕帝籍天子三推三公五推卿諸侯九推反執爵於太廟三公九卿諸侯大夫皆御命曰勞酒謹案元日上辛也元辰郊後吉日也以干言辰以支

言互文也則是躬耕之典當行於祈穀之後而同在孟春之月也考之周禮天官甸師掌帥其屬而耕耨王藉以時入之以供粢盛此卽天子之籍田而甸師長之者也然籍田不獨天子有之諸侯亦然祭義曰天子爲藉千畝冕而朱紘躬秉耒諸侯爲藉百畝冕

而青絃躬秉耒以祀天地山川先王以爲醴酪黍稷於是乎取之敬之至也是故千畝百畝之數此天子諸侯之視爲等級而其躬耕以致敬則一也祭統曰天子親耕於南郊以供粢盛王后蠶於北郊以供純服諸侯耕於東郊亦以供粢盛夫人蠶於北郊以供冕服天子諸侯非莫耕也王后夫人非莫蠶也身致其誠信誠信之謂敬敬盡然後可以事神明此祭之道也是故南郊東郊之殊此天子諸侯視爲分別而其親耕以致誠信則一也後世躬耕不行藉田漸廢周宣王不藉千畝說文公諫曰夫民之大事在農上帝之粢盛於是乎出民之蕃庶於是乎生事之供給於是乎在和協輯睦於是乎興財用蕃殖於是乎始敦龐淳固於是乎成觀於此語而知藉田之義廣矣大矣漢文帝二年詔曰夫農天下之本也其開藉田朕親率耕以給宗廟粢盛夫文帝漢之賢君也此禮既舉後之明主亦猶能踵而行之然唯天子行之畿內天子而下無復有議及者幾比於繁縷大輅之不可請近代郡縣大者不唯比於古公侯之國而小者亦遠勝於子男之邦則藉田之禮皆所當行乃不唯郡縣不唯督撫即天子亦不能歲舉此禮即使歲舉此禮而郊畿而外雖公卿大夫鮮有能講明其義者今聖天子特舉躬耕以爲天下先自督撫以及郡縣州衛所等官凡在守土之司通行耕藉之禮此誠千古未有之曠典也臣身爲總制兩省封疆一身表率况瀛黔在萬里之遠僻近蠻荒一旦躬逢盛舉不獨山農野叟實所未聞卽縉紳士夫亦無從考覈臣不揣膚陋用表彰其義著爲藉田先農二說宣示僚屬遍告農夫使知我聖天子本此仁孝之至推廣誠敬之思而所以爲天下臣民祈天永命以同享夫萬邦慶豐之慶者其用意誠深且遠可不共殫其仁孝誠敬之心以奉聖眷而答天休哉至於耕藉儀注已詳於會典位有尊卑禮無二致可仿其意而行之無所容末議也臣謹稽首而爲之記

案清會典凡耕藉前期皇帝閱耕具尙書侍郎率其屬進耒鞭及箱於中和殿既事則徹而授順天府尹及幸藉田尙書進耒皇帝

三推

雍正二年乾隆九年皆有旨四推四返迄今每歲耕藉皇帝舉三推禮皆加一推

侍郎取種於箱而播之一光緒續志

「每歲耕藉之日祭先農壇禮畢各官俱更蟒袍補服省城督撫

秉耒知縣執青箱知府播種府城知府秉耒佐貳執青箱知縣播種州縣正印官秉耒佐貳執青箱播種專城衛所用正印官秉耒如無屬員即選擇耆老執青箱播種耕時用耆老一人牽牛農夫二人扶犁俱在九卿之例九推九返農夫終畝耕畢各率耆老農夫行望闕三跪九叩禮其農具俱用赤色牛用黑色箱用青色所盛籽種悉從各處土宜即著看守農夫灌溉耜田地方官不時勸課

社稷壇 在城大西門外明洪武元年令天下郡縣置社稷壇每歲於春秋二仲月上戊日致祭清代因之通省府屬各州縣皆與府同咸豐七年兵燹燬同治十二年總督劉嶽昭巡撫岑毓英重建

武帝廟 在城南門外清順治九年敕封忠義神武關聖大帝雍正三年頒定致祭從文廟例追封三代曾祖光昭公祖裕昌公父成忠公祀後殿如崇聖祠例每歲春秋二仲月奉部定期督撫率司道以下官致祭各府知府主之各州縣知州知縣主之同城文武官員悉陪祭乾隆三十三年加封靈佑四十一年特命改謚忠義嘉慶十八年加封仁勇二十年普洱鎮總兵王萬清同各標鎮協營移建城小西門內即舊三聖廟道光朝加封威顯咸豐中累加封護國保民精誠綏靖三年升中祀追封三代王爵六年改封關聖大帝同治九年加封翊贊御賜威宣南徽額十三年後殿火署總督岑毓英重修建櫺星門東西二門規模悉照文廟

案關帝廟城鄉甚多不能備載各府州縣

文昌廟

在會城大西門外

李志以下均同景泰圖經云舊在長春觀西偏景泰間移建廣威門外有道士主之署之曰文昌宮

嘉慶六年禮

部太常寺遵旨議定文昌帝君廟仿照崇祀關帝春秋致祭之禮

定以每歲三月初三日聖誕爲春祭其秋祭由欽天監選定吉期

彙入祀冊交與太常寺按期題請一應儀注均與致祭關帝同又

奏准各直省舊有文昌廟應照山西解州等處關帝廟之例令該

地方官屆期恭詣致祭其向無祠廟之處令擇潔淨公所設位致

祭祭畢徹位隨祝帛送燎毋得棄置褻慢又奉旨重修正殿

大清會典事例

咸豐六年升中祀七年兵燹廟燬同治十三年總督劉嶽昭巡撫

岑毓英照舊基址重建光緒三年總督劉長佑巡撫潘鼎新添建

後殿樓五間六年紳民張夢齡等倡捐添建廂樓左右各六間近

已改爲工業學校矣

案文昌宮城鄉俱建不能備載各府州縣同光緒志兼採訪

龍神祠 在城西門內九龍池上雍正六年敕封福滇益農龍王內

府造像輦送至滇建祠以時致祭月吉瞻禮雍正志兵燹傾圮同治十

三年署總督岑毓英由各堡籌款重修近已改爲博物館矣案龍王廟在各村邑

不列祀典者載入俗祀各府州縣同光緒志兼採訪

城隍廟 在城西門內明洪武二年令有司祭城隍仍前代禮府封

威靈公州封靈佑侯縣封顯佑伯三年改今稱廟三楹中祀雲南

省城都城隍之神左祀雲南府城隍之神右祀昆明縣城隍之神

清代因之康熙兩志康熙二十八年巡撫王繼文重修道光十二年知府

董國華重修昆明縣志略光緒元年署總督岑毓英重修十一年知縣鳴

泰續修近已改爲電影場矣道光光緒兩志兼採訪

旗纛廟 在城內總督箭道後每歲春用驚蟄日祭秋用霜降日祭

以督標中營副將主之撫標及各營將官俱陪祭

各標鎮協營俱同道光志

舊在城

南康熙三十年總督范承勳巡撫王繼文移建

雲南府志

同治二年馬榮

踞省折毀過半同治光緒間續修

光緒志

清末武營改制祭亦尋廢廟

址改建法政學校

昆明縣採訪

礦神廟 原建於東川府乾隆五十七年總督富綱巡撫譚尙忠以

銅廠豐旺請神封號奉旨敕封裕源興寶礦脈龍神於廠地相度

處所建設總祠春秋致祭其大小各廠聽其自行立祠御書靈裕

九圍匾額部頒祝文又道光元年護理巡撫布政使玉輅暨各官

復建祠於翊靈寺內春秋致祭

昆明縣志略

光緒五年布政使升泰重修

新建客廳三楹草亭一座

光緒志

光緒末年改爲高等審判廳祭亦尋

廢

昆明縣採訪

鹽龍王廟

舊在城南門外鹽店街清康熙間建咸豐七年燬光緒

三年鹽道沈壽榕移建於城內祖遍山大德寺旁光緒志現已改爲學

校

探訪

火神廟

一在城北門外校場久廢一在城南門外校場萬曆志雍正志同清咸

豐七年兵燬同治十三年署總督岑毓英重修光緒志現已改爲蔡公

祠祀前雲南都督蔡鏐

探訪

金馬山神祠

在城東金馬山麓

雲南府志

清康熙二十三年貝子章泰命

布政使田啓光重建嘉慶九年修二十一年六營官弁新建神驥

亭道光十一年重修咸豐七年匪徒犯省折毀過半同治十三年

署總督岑毓英捐廉重修

光緒志

附侍讀諸城李澄中重九遊金馬寺詩

迢遞層岡路欲迷深松方塔亂崖西又乘旭日來金馬曾逐涼風上碧雞
故壘幾經秋草沒荒城依舊夜烏啼登高漫說他鄉遠美酒茶羹尚可攜

碧雞山神祠

在城西碧雞山麓

雲南府志

現坍塌未修

光緒志

附漢王褒移金馬碧雞文

持節使王褒謹拜南崖敬移金精神馬縹碧之雞處南之荒深谿回谷非土之鄉歸徠歸徠漢德無疆廣乎唐虞澤配三皇黃龍見
兮白虎仁歸徠歸徠可以爲倫歸兮翔兮何事南荒也

史皇祠

在學宮內受圖制字爲書契祖清康熙五十八年奉文建

雍正志 光緒五年總督劉長佑巡撫杜瑞聯等重修

案史皇祠奎星閣皆春秋二仲月上丁致祭各府州縣同 光緒志

奎星閣

在學宮左明崇禎元年知府王紹且建清康熙五十八年

教授侯以章建奎星樓易舊奎星樓爲桂香樓祀文昌

案奎星閣城鄉俱建祀不能悉載各府州

縣同道光志

光緒五年總督劉長佑巡撫杜瑞聯等重修

光緒志

忠誠廟

在府志南正德四年太監崔安建祀蜀漢丞相諸葛亮奏

賜廟額歲春秋祭

萬曆志

諸葛武侯祠 在城內五華山各志同清康熙二十六年糧儲道孔興詔

建五十年總督王繼文巡撫石文晟修春秋二仲擇吉致祭道光

十五年大學士總督阮元重修額曰諸葛武侯祠堂昆明縣志略同治二

年馬榮踞省折毀十三年鹽道沈壽榕倡同各文武重修光緒志

附鹽道沈壽榕重修五華山武侯祠記

滇人之重諸葛武侯也以征南功故祀之祀之於郡縣者不可勝數而會城五華山之廟爲最古名亦最著其始建於康熙二十六

年前署糧儲道孔君興詔倡之至五十年總督王公繼文巡撫石公文晟始以春秋修祀事至乾隆十二年總督張公允隨重修之

道光十五年節相阮公元增祀李侯侯呂侯侯忠烈太守祿於左右兩廡其碑尙可讀咸豐六年迤西盜起圍省城者三危而

復安者屢非侯之靈有以默相之歟同治十一年春壽榕率滇軍援黔克復興義府城仲冬始返再拜侯祠傾圮過半乃集同官捐

俸修葺以昆明張君夢齡張君兆鳳任其事至癸酉冬而咸鳴乎儒臣若忠武侯者志同伊呂從祀孔子廟庭如日星在天照耀寰

宇初不繫廟之有無而滇南荒服雖蠻夷霧集備夫版婦有謳歌俎豆而不能忘者正天道人心之不能沒也曩榕宦蜀中遊錦官

名宦祠

在學宮內通省府屬各州縣皆與府同

雍正志

鄉賢祠

在學宮內通省府屬各州縣皆與府同

雍正志

忠義孝弟祠 在學宮內清雍正四年奉旨建通省府屬各州縣皆

與府同

雍正志

節孝祠 在學宮外清雍正四年奉旨建雍正志以上四祠俱於光緒五

年總督劉長佑巡撫杜瑞聯等重修

光緒志

案節孝祠原在敷深門外康熙六十一年知縣朱若功以忠孝節義合祀題額曰三綱祠春秋二仲月崇祀諸人之後裔自行致祭道光六年奏議遵旨建於附近學宮及大清通禮所定之制遂各捐貲於明倫堂後購地創建七年五月告成列入祀典照例致祭

又案以上四祠通省府屬各州縣同俱於春秋二仲月釋奠畢教諭謁祠致祭

賢良祠 在城內糧道街清乾隆四年奉旨建祀總督文端公鄂爾

泰巡撫楊文定公名時臨元鎮總兵官魏翥國中建碑亭碑刻上

諭及御書龍章二字春秋二仲諷吉致祭以知府主之道光四年

總督明山巡撫韓克均倡修

昆明縣志略

同治二年馬榮踞省折毀過半

十二年紳士楊璟等稟將育材書院暫寓其中署總督岑毓英籌